

**Obraćanje zamjenika predsjedavajućeg Doma naroda Parlamentarne skupštine
Bosne i Hercegovine Kemala Ademovića povodom Dana Oružanih snaga
Bosne i Hercegovine u Ambasadi Bosne i Hercegovine u Washingtonu, DC,
Sjedinjene Američke Države
Washington, DC, SAD, 3. decembar 2024.**

„Uvaženi ambasadore Svene Alkalaju,

Poštovani brigadiru Edine Čizmiću,

Poštovani pukovniče Zorane Joviću,

Visoko cijenjeni generale Collins,

ekselencije, generali, vojni atašei, dame i gospodo,

Velika mi je čast i zadovoljstvo što danas mogu biti ovdje s vama, te vas pozdraviti u ime Doma naroda Parlamentarne skupštine Bosne i Hercegovine i u svoje lično ime.

Oružane snage Bosne i Hercegovine su simbol uspjeha postdejtonske Bosne i Hercegovine jer označavaju jednu od najuspješnijih institucionalnih reformi u Bosni i Hercegovini. Posebno je važno istaći kako su Oružane snage BiH u rekordnom roku prešle iz statusa primaoca u status davaoca međunarodne vojne pomoći. Oružane snage BiH su učestvovala u brojnim međunarodnim mirovnim misijama izvan države, dok u Bosni i Hercegovini igraju značajnu ulogu u pomoći prilikom velikih nepogoda poput nedavnih poplava koje su zahvatile Bosnu i Hercegovinu. Oružane snage BiH su naš ponos i temelj sigurnosti i stabilnosti naše države Bosne i Hercegovine i generacija koje dolaze.

Mi u Bosni i Hercegovini duboko cijenimo podršku Sjedinjenih Američkih Država, naših američkih prijatelja i saveznika, što bilateralno što u okviru NATO partnerstva, u očuvanju našeg suvereniteta, teritorijalnog integriteta i multietničkog karaktera. Ovom prilikom posebnu zahvalnost želim izraziti Nacionalnoj gardi savezne države Maryland. Hvala vam na vašem predanom radu, služenju i kontinuiranoj podršci Bosni i Hercegovini kroz Program državnog partnerstva.

Svim mojim sunarodnjacima, pripadnicima i pripadnicama Oružanih snaga Bosne i Hercegovine, koji hrabro i ponosno nose zastavu naše domovine na svojim uniformama, želim sretan Dan Oružanih snaga Bosne i Hercegovine!

Na kraju, našim domaćinima u Sjedinjenim Američkim Državama želim izraziti iskrene čestitke i najljepše želje za praznike Dan zahvalnosti i nadolazeći Božić i Novu godinu.

Hvala vam!“ (kraj)